

## ADYAYA I

### PURWAKA

#### 1.1 Dadalan Pikobet

Sajeroning paguron-guron paiketan manah sisia miwah guru pinih banget kauratiang, duaning sangkaning punika presida mangguh tetujon paplajahan sane kaaptiang. Lianan ring punika dados guru mangda uning indik *media paplajahan* lan *model* sane kaanggen ngajahin tur anut sareng kawentenan sisia. *Media paplajahan* inggih punika piranti sane kaanggen ngajahin mangda napi sane kaajahin presida becik karesepang olih sisia ( Suraya, 2012 :205), taler model paplajahan inggih punika tata cara sane kaanggen ngawedarang pangrencana paplajahan sane sampun kakaryanin tur ngamolihang sane mautama, Sanjaya ( 2010: 147). Ring kawentenan sekadi mangkin guru miwah sisia rikala malajah nenten madue paiketan manah sane masikian ritakla malajah utaminyane malajah Bahasa Bali, akeh sisia sane leklekan miwah jekeh sareng guru rikala malajah, nika taler presida nutdut paplajahan nenten memargi antar, nika mawinan paiketan guru miwah sisia sandang kauratiang. Lianan ring punika, kawentenan *model* paplajahan punika sane pinih mautama mangda paplajahan sane kamargiang nenten nir guna kawentenannyane, lianan ring ring metode, model paplajahan pinih taler mabuat pisan kawentenannyane.

Rikala ngajahin, akeh kapanggihin guru kari nganggen *model* paplajahan sane lumrah paplajahan sane nenten anut sareng kahanan sisia utamanyane ring SMA Wirabhakti Singaraja. Irika kacingakin guru kantun nganggen *Direct Learning* sane pinaka tata cara ngajahin antuk langsung, kewanten taler nganggen

internet. Irika kacingak guru kanton asal-asalan ngajahin, sinalih tunggilnyane ngajahin mapupuh sinom. Rikala panilik ngelaksanayang observasi irika taler panilik polih ngelaksanayang sadu wicara indik tata cara ngajahin, kemaon indik penampen guru, guru nika memang durung ngaresep indik ngajahin mapupuh sinom, duaning nenten kesenangan saking guru punika matembang, nika sane ngawinang guru punika asal-asalan rikala ngajahin, utamnyane ngajahin matembang. Saking pikolih observasine punika panilik madue pepineh antuk nureksain *Model Direct Learning* puniki manut panilik kari kirang kalaksanayang, duaning akeh kapanggihin sisia sane gelis med rikala nyarengin paplajahan, saha pangresep sisia kanton kirang duaning *minim* malajah. Nika ngawinnag sisia kirang ngaresep paplajahan sane kaajahin olih gurunyane utamanyane paplajahan Bahasa Bali. Nika mawinan kawentena *model* sarat pesan kauratiang. Iriki panilik meled nilikin indik *model* sane patut kaanggen ngajahin inggih punika antuk *Model Blended Learning*.

*Model Blended Learning* inggih punika tata cara ngajahin sane kalaksanayang antuk kalih cara, tatap muka lan paplajahan sane berbasis *link*. *Model Blended Learning* puniki kamargiang sekadi paplajahan biasane, binanayane rikala malajah guru tatap muka, guru taler ngicenin *link video* paplajahan sane sampun ka unggah ring *aplikasi YouTube*, guru ngicenin pawarah sareng sisia antuk *download* saha nyingakin indik *video* paplajahan sane sampun kakaryanin olih guru. Nika mawinan, *model* puniki becik kamargiang, napi malih ring kawentenan jagate sekadi mangkin, sangkaning *Covid-19* sane sampun ngusak asik utamanyane ring widang *pendidikan*, kawentenan sisia sampun polih malajah ring jero soang-soang, nanging sane mangkin paplajahan sampun presida

mamargi sekadi biasane, dadosnyane sisia sampun nenten paling malih yening kaicenin media paplajahan marupa *link YouTube*, pastika sisia sampun biasa malajah nganggen *link* punika, saha ngaresep indik napi sane kaajahin, Dwiyogo (2012). Napi malih yening malajahin paplajahan indik *praktek*, utamanyane papalajahan basa Bali, inggih punika tembang pupuh.

Tembang pupuh pinaka soroh panca gita sane marupa gegitayan utawi nyanyian rohani sane kaangen sarana ritakala ngalaksanayang panca yadnya tur patut kawerdiang kawentenannyane. Pupuh pinaka tembang sane presida kaanggen nyinahang wirasa sang sane matembang. Wenten akeh makudang-kudang pupuh inggih punika, pupuh pucung, pupuh ginada, pupuh sinom, pupuh ginanti, pupuh maskumambang, pupuh durma, pupuh dandang gula, pupuh mijil, pupuh pangkur, miwah pupuh semarandana Jelantik (2006:33). Saking makudang-kudang pupuh punika, panilik wantah nilikin siki pupuh kematen, inggih punika pupuh sinom, santukan pupuh puniki madue tatuek sane becik, plapan tur susila, saha becik kaanggen ngamarginin kauripan ring jagate. Pupuh puniki taler madue pada lingsanyane minakadi 8a, 8i, 8a, 8i, 8i, 8u, 8a, 8i, 4u, 8a. Wenten makudang-kudang pupuh sinom inggih punika, pupuh sinom payangan, sinom siwa gati, pupuh sinom dasar, pupuh sinom silir, pupuh sinom bancih, pupuh sinom giri putri, (Wayan Budha Gautama, 2007:67).

Kawagedan matembang sarat pisan kalaksanayang ring sekolah, mangda sisia presida uning indik tembang pupuh lan presida kaanggen gagamelan utawi bekel risajeroning ngamargiang swadarma utaminipun rikala maturan ka pura mangda presida ngayah, nyarengin wimbakara tur utaminyane mangda presida uning indik daging tembange punika. Napi malih sane dados krama Bali, sampun

patut pisan malajahin punika, duaning ring saluir upakara pastika nganggen tembang pinaka sarana tur upasaksi rikala ngaturang persembahyangan punika sane kabaos Dharma Gita.

Yadiastun akeh pesan kawigunan tembange punika, nanging nenten sami seneng matembang pupuh punika. Wnten taler sane nenten seneng krana gengsi, miwah meweh malajahin wewiletan punika, nika taler sane ngawinang para yowana nenten meled malajahin tembange punika. Lian ring punika akeh panilik manggihin sisia sane kari kirang ngresep indik tembang pupuh utaminyanne ring sisia *Kelas XI IPB SMA Wirabhakti Singaraja*. Saking 4 Kelas sane wenten ring SMA Wirabhakti Singaraja, inggih punika wenten kelas X IPB, XI IPB, XII IPB lan XII IPS kelas puniki manten sane akehan nenten uning sareng tembang pupuh duaning kawentenan *media* lan *model* paplajahan sane kaicenin olih gurunyan nenten kacumponin olih sisia, nika sane mawinan minat sisia malajah kari kirang.

Manut sekadi saseeleh sane kalaksanayang antuk saduwicara sareng guru bahasa Bali SMA Wirabhakti Singaraja Komang Sukraningsih S.Pd. ngamolihang keterangan yening pamargin paplajahan matembang sampun nganutin *Kurikulum*, *Silabus* lan *RPP*, nanging pikolih kawagedan risajeroning matembang pupuh Sisia Kelas XI IPB SMA Wirabhakti Singaraja kemaon kabaos kantun kirang. Sisia sukeh malajah matembang, tur duaning kabada antuk galah malajah ring sekolah. Pinaka imbanyane ring sisia kelas XI IPB SMA Wirabhakti Singaraja wantah kidik sane mresidayang nembangang pupuh Sinom punika. Yening sayan rahina utawi terus-terusan sekadi punika, sinah paplajahan nenten anut sareng tetujon sane kaaptiang.

Sangkaning kawentenan pikobete punika, panilik meled nilikin saha nyangkepin paplajahan sane sampun memargi, mangda sayan paripurna tur sayan nincap, inggih punika antuk nganggen *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja. Tetilikan nganggen *Model Blended Learning* pinaka tetilikan sane kapertama. Keamon, daaweg sane sampun lintang, wenten panilik sane nganggen pupuh sinom inggih punika tetilikan saking Ni Luh Astini (2016) Ngawigunayang *Media Audio-Visual* Anggen Nincapang Kawagedan Nembangang Pupuh Sinom Ring Sisia Kelas XI IBB 2 SMA Negeri 3 Singaraja, sane nilikin indik kawagedan sisia nembangang Pupuh Sinom antuk nganggen *Media Audio-Visual*. Dadosnyane tetilikan sane nganggen *Model Blended Learning* puniki wantah tetilikan sane kapertama wenten ring Pendidikan Bahasa Bali Undiksha.

Malarapan antuk punika sane ngawinang manah panilik kadaut antuk nilikin pamargin papalajahan sajeroning matembang pupuh Sinom ring Sisia Kelas XI IPB SMA Wirabhakti Singaraja antuk nganggen *Model Blended Learning*. Taler pinaka ceciren iraga uning ring kawentenan panglimbak *Digital* ring aab sekadi mangkin, guru kaaptiang mangda sayan waged, *kreatif* lan *kolaboratif* nganggen saluir *media* sane pinih becik kaanggen ngajahin. Duaning kadi asapunika, panilik meled ngamedalang tetilikan sane mamurda *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja, mangda sisia sayan ngaresep tur waged matembang, utamanyane tembang pupuh Sinom mangda pikolih malajah sayan *maksimal*.

## 1.2 Ngarereh Pikobet

Sajeroning tetilikan puniki panilik nemuang makudang-kudang pikobet lan anut sekadi dadalan pikobet sane katelatarang ring ajeng. Pikobet sane sampun karereh mapaiketan sareng paplajahan matembang melarapan antuk murda *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja. Pikobet sane sampun kapolihang inggih punika (1) Sapunapi pidabdab nganggen *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja? sane kaping ( 2) Sapunapi pikolih ngawigunayang *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja? (3)Sapunapi panampen sisia indik *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja? (4) Sapunapi pikobet sisia indik *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja?

## 1.3 Ngawatesin Pikobet

Sajeroning tetilikan saje pacang kalaksanayang, panilik kantun akeh kacunduk tur kantun malih nureksain pikobet sane sampun katemuang. Nanging pikobete punika kawatesin riantukan kawentenan makudang-kudang parindikan minekadi , tetilikan kabanda antuk galah, ngicenin galah majeng ring panilik sane tiosan antuk maripurnayang tetilikan puniki. Nika sane ngawinang panilik ngawatesin pikobetyane.

#### 1.4 Bantang Pikobet

Maduluran antuk dadalan pikobet ring ajeng, tetilikan puniki madue bantang pikobet sekadi ring sor :

1. Sapunapi pidabdab nganggen *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja?
2. Sapunapi pikolih ngawigunayang *Mode Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja ?
3. Sapunapi panampen sisia nganggen *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja ?

#### 1.5 Tetujon Tetilikan

Sajeroning pakaryan pastika madue tatujon, pateh sekadi ring tetilikan pastika madue tatujonyane. Sekadi sane sampun katlatarang ring dadalan pikobet ring ajeng, tetujon tetilikan sekadi ring sor puniki:

- a. Mangda sisia uning indik pidabdab rikalaning nganggen *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja
- b. Mangda uning asapunapi indik pikolih ngawigunayang *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja

- c. Mangda uning indik sapunapi panampen sisia nganggen *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja

## 1.6 Kawigunan Tetilikan

Tetilikan sane mamurda *Model Blended Learning* Kaanggen Nincapang Kawagedan Mapupuh Sinom ring Sisia Kelas XI IPB SMA Wirabhakti Singaraja, wenten kawigunannyane sekadi ring sor :

### 1.6.1 Kawigunan Pamucuk (Teoritis)

Tetilikan puniki banget keaptiang mangda mawiguna risaejeroning paguron-gurun tur sayan ngalimbak dados widia (pengetahuan) sane utama tur presida kaanggen pakeling ring kawentenane dados jatma mangda sayan ngajegang tetamian lelhure punika, sinalih tunggilnyane lengut malajah tembang, inggian punika tembang Pupuh Sinom.

### 1.6.2 Kawigunan Panglimbak (Praktis)

Kawiguna panglimbak punika sayan becik, rikala sepat siku-siku sayan katelebang punika sekadi ring sor :

#### a. Majeng ring Sisia

Tetilikane punika mawiguna majeng ring sisia presida kaanggen paweweh kaweruhan mangda sayan uning tur waged risaejeroning matembang utamanyane tembang pupuh sinom nganggen *metode blended learning*.



**b. Majeng ring Guru Bahasa Bali**

Tetilikane puniki presida kaanggen paweweh aji kaweruhan tur presida uning kawagedan sisia, kaiwangan miwah pikobet sane kapanggihin ri kala matembang pupuh sinom *nganggen Model Blended Learning*. Risampun uning, Guru prasida ngicenin panuntunan taler pamargi indik kakirangan sane katemuang olih sisia.

**c. Majeng ring panilik selanturnyane**

Tetilikan puniki banget keaptiang mawiguna majeng ring panilik sane lianan utawi selanturnyane, presida keanggen pabinayan utawi perbandingan ri sajeroning tetilikan selanturnyane sane asoroh tur sane pacang kamargiang.

**d. Majeng panilik**

Presida kaanggen dasar ri kala panilik benjang pungkur kacunduk sareng sisia sekadi sane katlatang ring ajeng tur rikala sampun dados guru nenten malih paling, duaning sampun madue gagamelan ritatakala ngajahin, inggih punika nganggen *Model Blended Learning*.

